

Respublika oliy ta'lim muassasalari bakalavriatiga kirish test sinovlarini o'tkazish tartibini takomillashtirish to'g'risida

O'zbekiston Respublikasi Prezidentining 2017-yil 16-noyabrdagi PQ-3389-son qarori

Respublika oliy ta'lim muassasalarida o'quv jarayonlarini takomillashtirish, yoshlarga zamonaviy talablar asosida ta'lim berish bugungi kunning asosiy masalalaridan biridir. Bu borada oliy ta'lim muassasalariga kirish test sinovlarini adolatli, xolis va shaffof o'tkazish orqali puxta bilimli yoshlarning o'qishga qabul qilinishini ta'minlash muhim ahamiyat kasb etadi.

Lekin bugungi kunda test sinovlari orqali oliy ta'lim muassasalari bakalavriatiga talabalarni qabul qilishda bir qator kamchiliklar mavjud. Jumladan, keyingi yillarda test sinovlarini o'tkazish tartib-qoidalari, test sinovlari natijalarini e'lon qilish va uni takomillashtirish borasidagi olib borilayotgan ishlar bugungi kun talablariga to'liq javob bera olmayapti. Bu hol manfaatdor jamoatchilikning, ayniqsa, ota-onalarning test sinovlarini o'tkazish jarayonlariga haqli ravishdagi e'tirozlarini keltirib chiqarmoqda va har yili ularning ushbu masala yuzasidan qariyb 4 mingdan ziyod asosli murojaatlari kelib tushmoqda.

Ta'kidlash joizki, kirish test sinovlari topshiriqlari va uni o'tkazish talablari qobiliyatli yoshlarni oliy ta'limga qabul qilish mezonlariga to'la javob bermaydi. Ayniqsa, ijodkorlik va individual mahoratni talab etadigan madaniyat, san'at, dizayn, tasviriy va amaliy san'at, san'atshunoslik, musiqiy ta'lim, sport va jismoniy tarbiya sohasidagi ta'lim yo'nalishlariga iqtidorli yoshlar o'rniga, ushbu sohalarda yetarli iqtidorga ega bo'lmagan yoshlar test sinovlari orqali o'qishga qabul qilinmoqda.

Respublika oliy ta'lim muassasalariga kirish uchun test sinovlarini o'tkazishning moddiy-texnik ta'minoti bilan bog'liq masalalarni ham butunlay qaytadan ko'rib chiqish taqozo etilmoqda. Zero, bugungi kunda test sinovlari natijalari 2000 yilda xarid qilingan 4 ta optik skaner orqali chiqarilishi, test materiallarini chop etishga mo'ljallangan ofis texnikasi (printer va kompyuterlar) ma'naviy va jismoniy jihatdan eskirib ketganligi oqibatida test sinovlari natijalari qariyb 15-20 kunga cho'zilib e'lon qilinishi bugungi kun talablariga javob bermaydi.

Mamlakatimizda kadrlar tayyorlash tizimini yanada takomillashtirish, iqtisodiyot va ijtimoiy soha tarmoqlarini yuqori malakali mutaxassislar bilan ta'minlash uchun oliy ta'lim muassasalarining bakalavriatiga qabul qilish bo'yicha o'tkaziladigan kirish test sinovlarini takomillashtirish, uning adolatli, xolis va shaffof o'tkazilishini tashkil etish maqsadida:

1. O'zbekiston Respublikasi Oliy va o'rta maxsus ta'lim vazirligi, Xalq ta'limi vazirligi, Iqtisodiyot vazirligi, Moliya vazirligi va O'zbekiston Respublikasi Vazirlar Mahkamasi huzuridagi Davlat test markazi (keyingi o'rinlarda Davlat test markazi deb ataladi)ning oliy ta'lim muassasalari bakalavriatiga o'qishga qabul qilish (keyingi o'rinlarda oliy ta'lim muassasasiga qabul qilish deb ataladi) bo'yicha kirish test sinovlarini o'tkazish tizimini takomillashtirish yuzasidan quyidagilarni nazarda tutuvchi takliflari ma'qullansin:

2018/2019-o'quv yilidan boshlab oliy ta'lim muassasasiga qabul qilish bo'yicha kirish test sinovlarini 1-avgustdan 15-avgustgacha bo'lgan davrda o'tkazish;

kirish test sinovlari natijalarini test o'tkazilgan kunning ertasiga Davlat test markazining rasmiy veb-saytida e'lon qilish;

abituriyentdan alohida iqtidor talab etiladigan madaniyat, san'at, dizayn, tasviriy va amaliy san'at, san'atshunoslik, musiqiy ta'lim, sport va jismoniy tarbiya sohasidagi ta'lim yo'nalishlariga qabul qilishni kirish test sinovlarisiz, ijodiy imtihonlar orqali amalga oshirish.

2. Davlat test markazi, O‘zbekiston Respublikasi Oliy va o‘rta maxsus ta’lim vazirligi, Qoraqalpog‘iston Respublikasi Vazirlar Kengashi, viloyatlar va Toshkent shahri hokimliklari hamda tasarrufida oliy ta’lim muassasalari bo‘lgan vazirliklar va idoralar 2018/2019-o‘quv yilidan boshlab, oliy ta’lim muassasasiga o‘qishga qabul qilish bo‘yicha kirish test sinovlari Toshkent shahrida “O‘zekspomarkaz” Milliy ko‘rgazmalar majmuasi pavilonlari hamda uning hududida o‘rnatiladigan qo‘shimcha yig‘ma pavilonlarda, shuningdek, katta sig‘imdagi boshqa binolarda, viloyat markazlaridagi Olimpiya zaxiralari kollejlari yoki boshqa tashkilotlarning katta sig‘imdagi binolarida o‘tkazilishini, test jarayonining maksimal darajada oshkora va shaffofligini ta’minlab, videokuzatuvlar orqali jamoatchilik, shu jumladan abituriyentlar ota-onalarining kirish test sinovlarini onlayn rejimida kuzatib borishlariga imkoniyat yaratilishini ta’minlasinlar.

3. Qoraqalpog‘iston Respublikasi Vazirlar Kengashi, viloyatlar va Toshkent shahri hokimliklari:

test sinovlari o‘tkaziladigan bino va pavilonlarni zarur mebellar (stol, stul, doska va boshqa zarur vositalar) bilan jihozlanishini;

Davlat test markazining hududiy vakillari uchun zarur moddiy-texnik vositalar bilan to‘liq jihozlangan alohida xona ajratilishini;

O‘zbekiston Respublikasi Axborot texnologiyalari va kommunikatsiyalarini rivojlantirish vazirligi bilan birgalikda katta sig‘imdagi binolarni test sinovi jarayonini videokuzatuvlar orqali onlayn tizimida ko‘rsatib o‘tkazish uchun zarur moddiy-texnik vositalar bilan to‘liq jihozlanishini ta’minlasinlar.

4. O‘zbekiston Respublikasi Moliya vazirligi:

test materiallarini tayyorlash va test sinovlari natijalari o‘z vaqtida e‘lon qilinishini ta’minlash maqsadida Davlat test markaziga zamonaviy moddiy-texnik vositalar va jihozlar xarid qilish uchun 2018-yildan boshlab O‘zbekiston Respublikasi Davlat byudjetidan zarur mablag‘lar ajratilishini nazarda tutsin;

Davlat test markazining byudjetdan tashqari mablag‘lari hamda oliy ta’lim muassasalarining oshirilgan to‘lov-kontrakt tushumlari (5 foizgacha miqdorda) hisobiga bir oy muddatda Davlat test markazi huzurida Davlat test markazi faoliyatini rivojlantirish jamg‘armasini tashkil etsin. Bunda Jamg‘arma mablag‘laridan quyidagi maqsadlar uchun foydalanilishi belgilab qo‘yilsin:

Davlat test markazining moddiy-texnik bazasini mustahkamlash;

xorijiy davlatlarning o‘quv va ilmiy muassasalarida Davlat test markazi xodimlarining malakasini oshirish;

Davlat test markazi xodimlarini moddiy rag‘batlantirish.

5. Davlat test markazi O‘zbekiston Respublikasi Moliya vazirligi bilan birgalikda O‘zbekiston Respublikasi Davlat test markazi huzuridagi Davlat test markazi faoliyatini rivojlantirish jamg‘armasi to‘g‘risidagi Nizomni bir oy muddatda ishlab chiqsin va uning O‘zbekiston Respublikasi Adliya vazirligida davlat ro‘yxatidan o‘tkazilishini ta’minlasin.

6. O‘zbekiston Respublikasi Axborot texnologiyalari va kommunikatsiyalarini rivojlantirish vazirligi respublikada amalga oshirilishi rejalashtirilayotgan “Xavfsiz shahar” tizimini yaratish dasturi doirasida test sinovlari jarayonini yoritish maqsadida shaxsni identifikatsiyalash vositalari, videofiksatsiya qurilmalari, metallodetektorlar, monitorlar va yig‘ma pavilonlarni

xarid qilsin hamda ularni davlat mulki sifatida O‘zbekiston Respublikasi Ichki ishlar vazirligi tizimiga operativ boshqaruv huquqi asosida bepul berilishini ta’minlasin.

7. Davlat test markazi O‘zbekiston Respublikasi Oliy va o‘rta maxsus ta’lim vazirligi, Xalq ta’limi vazirligi hamda Adliya vazirligi bilan birgalikda test sinovlarini o‘tkazish jarayoni ishtirokchilarining mas’uliyatini yanada oshirish va ularning javobgarligini belgilash bo‘yicha qonunchilikka tegishli o‘zgartirish va qo‘shimchalar kiritish yuzasidan bir oy muddatda O‘zbekiston Respublikasi Vazirlar Mahkamasiga taklif kiritsin.

8. O‘zbekiston Respublikasi Vazirlar Mahkamasi mazkur qarorda belgilangan vazifalardan kelib chiqqan holda Davlat test markazining xodimlarning cheklangan soni 150 nafar bo‘lgan yangilangan tuzilmasini tasdiqlash va uning faoliyatini yanada takomillashtirish to‘g‘risidagi Hukumat qarorini bir oy muddatda qabul qilsin.

9. Davlat test markazi manfaatdor vazirliklar va idoralar bilan birgalikda qonun hujjatlariga ushbu qarordan kelib chiqadigan o‘zgartirish va qo‘shimchalar to‘g‘risida bir oy muddatda Vazirlar Mahkamasiga taklif kiritsin.

10. Mazkur qarorning bajarilishini nazorat qilish O‘zbekiston Respublikasining Bosh vaziri A.N.Aripov, O‘zbekiston Respublikasi Prezidentining Davlat maslahatchisi A.N.Yunusxodjayev va O‘zbekiston Respublikasi Vazirlar Mahkamasi huzuridagi Davlat test markazi direktori M.M.Karimov zimmasiga yuklansin.

O‘zbekiston Respublikasi
Prezidenti

Sh.Mirziyoyev